

Allianza sustegna il Parc Ela

■ (anr) Il mais october realise-schan las 20 vischnancas da la regiun Grischun central la votaziun davart il contract en connex cun il Parc Ela. Da stad 1999 han fundà las vischnancas da la Val d'Alvra Alvagni, Alvaschagn, Bravuogn, Brinzauls, Filisur, Lantsch, Mon, Ferrera, Stierva, Surava, Casti e Tagn la «Allianza en la Val d'Alvra». Quella organizaziun s'engascha per in avegnir cun effects positivs a lunga durada per tut la regiun. Gia dal 2005 e dal 2008 aveva la populaziun en las 21 vischnancas dal parc acceptà il project Parc Ela. Il parc vegn dal 2008 fin 2011 sustegnì da chantun e confederaziun. Per ch'il Parc Ela survegnia er en avegnir da questa vart sustegn finanziel

sto l'uniun purtadra dal Parc Ela inoltrar ina dumonda da gestiun per ils onns 2012–2021. In element da questa dumonda è in contract cun tut las vischnancas dal parc: En quel contract decleran las vischnancas dad esser commembras da l'Uniun Parc Ela e da vulair cuntinuar cun la gestiun dal parc da natira.

«Il Parc Ela promova e sustegna svilups positivs a favur da l'economia, da la societad e da la natira», è l'Allianza en la Val d'Alvra persvasa, «la legislaziun dal parc na maina naginas ulteriuras leschas.» I saja la competenza da las vischnancas dal parc da decider il svilup futur da la regiun. Tenor l'Allianza fixescha la legislaziun dal parc mo sch'ina regiun

distga esser parc natiral e sch'ils projects da l'uniun purtadra vegnan sustegnids finanzielmaing. «Ils dretgs politics da la populaziun e las competenzas da las vischnancas restan intacts», punctuescha l'Allianza. Ultra da quai vegni fixà tenor ella en il plan directiv regional e chantunal ch'in parc natiral na haja per consequenza naginas ulteriuras pretensiuns legalas e ch'il dretg vertent restia vinavant en vigor.

«Il Parc Ela è ina da las paucas pussaivladads da stgaffir en nosas valladas ulteriur potenzial da svilup», scriva l'Allianza en sia comunicaziun. Perquai sustegna ella il parc e recumonda dad approvar il contract en connex cun il Parc Ela.



«Allianza en la Val d'Alvra» s'engascha per in avegnir cun effects positivs a lunga durada per tut la regiun.